

2007

NARBOLIA SANTA REPARADA

10 ottobre 2007

POETAS:

ZIZI BERNARDU

MUREDDU CELESTINO

1° TEMA: PERDONU – VENDITTA

2° TEMA: CORAGGIU - PAURA

RIMAS A BOLU VOLUME 9

POETAS IMPROVVISADORES



NARBOLIA SANTA REPARADA

10 ottobre 2007

POETAS:

ZIZI BERNARDU

MUREDDU CELESTINO

1° TEMA: PERDONU – VENDITTA

2° TEMA: CORAGGIU - PAURA

Esordiu

1. Zizi (*tempo esecuzione 56"*)

Ogni annu puntuale Narbolia
a Reparada li rendes onore,
e invochende a issa ogni favore
a chelu mandas sa pregadoria,
deo cun sa modesta opera mia
comente sardu improvvisadore,
a su palcu torrende custu die
un'àteru saludu nde ato a tie.

2. Mureddu (*1'03"*)

Chi deo de virtude pagu nd'apa
l'ischides ca cumprendes poesia,
che io fatu a giovanu una tapa
e mi at premiadu una giuria,
oe de gioia mi esto sa capa
ca torro poi 'e tantu a Narbolia.
Mancari sia pagu preferidu
unu caldu saludu ndapo atidu.

3. Zizi (*48"*)

Lu fimis unu pagu in pensamentu
ca non pariat sa notte segura,
e nos fit già ponzende sa paura
ca comintzende a tirare su entu,
como est torradu in paghe ogni elementu
sa calma abasciende a sas alturas.
Sa paura est in totu allontanada
perigulu de fritu non bind'ada.

4. Mureddu (1'00")

Deo a viaggiare tenzo istima
de sa vetura mi che setzo a bordo,
ma prima sos invitos los cuncordo
poi ando a bendere versu e rima,
ma s'istat de arrivare a polo nordo
deo est tzertu ia fatu prima.
Sa idda 'e sa provincia de Oristanu
chi est de su polo nord piùs lonnanu

5. Zizi (42")

Motivu 'e dubitare non bind' ada
comente Tzelestinu ses bessidu,
a Narbolia che ses arrividu
e naras chi lontana lu est s'istrada,
antzis ti at intesu in cussa otada
chi innoghe lu ses pagu preferidu.
però si ses in custa residentzia
est signu chi ti ant dadu preferentzia.

6. Mureddu (1'00")

Rifletinde a bi pensende unu atzigu
mi nat su coro como ti cunfolta,
ma non la tenzo un'idea tola
e non penso ingannos né intrigu,
ma penso narat unu diciu antigu
chi bi at sempere una prima olta.
E poi inoghe podet sutzedire
s'ultimu a bennere s'ultimu a partire.

7. Zizi (41'')

A Narbolia naras ses amigu
e che amiga in sinu ti la inserra,
benis pro attendere a s'obligu
sena bi aere motivu a fagher gherra,
ancora narat unu ditziu antigu
sa prima olta nachi est de sa terra.
Tenta da oe 'e ti aberrer sas poltas
in modu 'e bi torrare àteras boltas.

8. Mureddu (1'07'')

Disizo 'e apagare dogni brama
ma non tenzo una mente virtuosa,
ma si so assistidu intro 'e s'ama
apago custa zente disizosa,
de su poeta chi tenet piùs fama
Narbolia isetat piùs cosa.
E chie est iscultende si diletat
si lis dasa tue cantu isetat.

9. Zizi (42'')

Tue non dias sos verso metzanos
tenta 'e los ponner totu cuntentesa,
oramai s'iscena l'ant cumpresa
chi semus tramontende sos antzianos,
e cando si ritirat sa etzesa
tando la sostituint sos giovanos.
Nois ormai de cudda dimora
semus unu pe intro e unu fora.

10. Mureddu (57")

Bernardu a sa logica ti aferra
ma tocat istanote de provedere,
ca dogni cosa già podet sutzedere
in custa nostra amena cuntierra,
piùs de chimbant'annos sese in gherra
prima o poi sas armas teves tzedere.
Ma isfrutala sa naturale dote
non chelzo chi las tzedas custa note.

11. Zizi (43")

Tzelestinu ti tenzo in simpatia
e non bind'at resone pro gherrare.
mi naras chi sas armas devo dare
ca cun megus non bi at piùs garanzia,
deo cunsigno solu s'arma mia
a unu ch'issa iscat manizare.
Proende a la toccare a giaru acua
si podet isparare a manu sua.

12. Mureddu (57")

Ma totu ispiegare ti cheria
da chi apo bonu sensu in su chelveddu,
già ti comprendo in cussu faeddu
ti tenzo deo puru simpatia,
poi sas armas de sa poesia
las seo manizende de piseddu.
Cun cussas armas la poto cumbatere
so sempre prontu a isparare àtere.

13. Zizi (42")

Mai isparare teves a sa zente
cando motivu perunu non bi ada,
cando ti enit un'arma cunsignada
cun dogni arma Tzeleste istes prudente,
a boltas osservende solamente
ti paret dae fora iscarrigada.
Ma cando iscarrigada paret fora
intro calchi cartuccia bi at ancora.

14. Mureddu (1'00")

Deo a nessunu nde fato dispretzu
ca trato cun rispetu e riguardu,
ma ischis a isparare so avetzu
e cando chelzo mi ponzo 'e azardo,
ma su fusile tou est tropu etzu
mi naras ite isparas o Bernardu.
Sas cartucias pro te sunt tropu caras
e istanote inoghe pagu isparas.

15. Zizi (38")

Non tenzo de isparare intenzione
su fusile non l'apo carrigadu,
ma su fusile chi at tantu isparadu
cun catzadores de professione,
l'ischimos unu pagu est consumadu
tenet bisonzu 'e sa revisione.
Ma tzertos su fusile ant postu fora
e sena bi aere isparadu ancora.

16. Mureddu (55")

Ma deo de isparare tenzo istile
in su bersagliu già non fato errore,
a daghì ch'esso chitzo a s'impuddile
proite sa vista la tenzo in favore,
ma tue naras chi sese catzadore
ma giughes solu a caddu fusile.
ca no est piùs fusile de amiru
times a ti negare calchi tiru.

17. Zizi (44")

Cuss'arma mi l'ant dada in Onifai
e la ritenzo un'arma valorosa,
arma chi podet naschere su guai
cun sa persona tropu baldantzosa,
cun s'arma etza non ti fides mai
ca s'arma semper lu est perigulosa.
Est menzus chi ti ponzas in ritiru
non siat chi bi partet calchi tiru.

18. Mureddu (55")

Chi paltat calchi tiru non bi creo
antzis chi no isparat so seguru,
poi si paltit calchi colpu duru
paro sa petorra e mi lu leo,
ma su fusile che apico a su muru
faghet bella figura in su museo.
Proite est tropu etzu bene atua
incue faghet sa figura sua.

19. Zizi (39")

Non bindamus bidea de isparare
ca non semus nemigos odiados,
comente frades nos semus amados
e comente aigussos demis istare,
ca bennidos lu semus disarmados
pro poder custa zente cuntentare.
Amos a fagher a poi sos conclusos
salvos umpare o mortos totarduos.

20. Mureddu (1'00")

Ca so avesu in sa vida terrena
de osservare donzi maestria,
e de mi cunfrontare in dogni iscena
non penso inferiore deo sia,
ca non d'istudo sa candela anzena
pro lugher piùsu sa candela mia.
De las ponner a faca tenzo a usu
pro ider sa chi lughet de piùsu.

21. Zizi (40")

Isperamos de tenner bona sorte
in custa gara nostra 'e poesia,
non bi cheret peruna timoria
bisonzat fagher sempre coro forte,
non faeddemas de armas de morte
sas campanas non sonent agonia.
si ant sa copia nostra preferida
intonamos sos innos a sa vida.

22. Mureddu (59")

Est custa nostra poetica isfida
s'isfogu de su donu 'e sa natura,
amos fatu pro cantare s'arrivida,
ponimos a cantare aficu e cura
ca est su peus isbagliu in custa vida,
De isbagliare a tenner paura
Proite unu ditziu bene narat
isbagliende, isbagliende già s'imparada.

23. Zizi (39")

Gai imparende curregin s'errore
bastat ponner sa mente in movimentu,
como lassamos totu su lamentu
e bintramos in campu in bonumore,
su comitadu organizzatore
te daer prontu a dare un'argumentu.
A isparare como non cumberit
lu lassamos a dominiga chi enit.

24. Mureddu (55")

Namos de isparare nd'amos usu
ca si usat a narrer de gasie,
ma non cheria fagher cussu abusu
non mi permito 'e isparare a tie,
ma tenzo chimbant'annos e piùsu
deo so isbagliende donzi die.
Paret si sigo a isbagliare gai
abesumeu non b'imparo mai.

1° tema, "su perdonu" Zizi "sa vendeta" Mureddu

1. Zizi (*tempo esecuzione 52"*)

S'esordiu in paghe amos lassadu
sena motivos de rivalidade,
ma su tema chi como ant sorteggiadu
a mie ponet in difficultade,
paret chi deva fagher caridade
daghì dae minore apo imparadu.
E mi paret su tema piùs bonu
ca mi ant dadu a cantare su perdonu.

2. Murteddu (*1'01"*)

Sa parte esordiale amos finidu
no at sutzessu perunu disafiu,
ca in paghe s'esordiu at nadu adiu
su chi apo popitidu bo l'apo ofridu,
ma tocat de li ponner forza e briu
su primu tema como est arrividu.
E tocat sa parte chi mi feta
ca mi est tocada a mie sa vendeta.

3. Zizi (*45"*)

In sa vendeta non bi at acuiсту
ite nd'as tentu si as venticadu,
deo chi apo semper perdonadu
so fatende comente a Gesù Cristu,
cando a su babu sou at nadu tristu
in su momentu chi l'ana incravadu.
Nande lassa chi s'odiu si disvaghene
perdona ca non ischin su chi faghene.

4. Mureddu (1'00")

Bernardu su perdonu ti aministra
non apo a fagher peruna protesta,
ma nde rendo s'idea manifesta
pro chie lassat s'istrada maistra,
si unu ciafu mi dana a sa sinistra,
non so pensende a bi porrer sa dresta.
Chie cun megus faghet cussa proa,
si devet ponner dentiera noa.

5. Zizi (40")

Cussu perdonu non ti les a giogu
o Tzelestinu bi debes pensare,
a sa vendeta non dias isfogu
e mai penses de ti vendicare,
su perdonu est che aba etada a fogu
chi su fogu lu podet istudare.
Sa vendeta est benzina e faghet dannu
e su fogu diventat piùs mannu.

6. Mureddu (1'01")

Sa vida umana si bi las cumpresa
ca non so fizu 'e una sorte avara,
mi nat sa zente a vivere impara
e teves esser prontu a sa difesa,
ca chie a mie faghet un'ofesa
amentadilu mi la pagat cara.
Chi li piagat o non li piagat
però prima o poi mi la pagat.

7. Zizi (41")

Ma no andes chilchende pilu in s'ou
inue non nde podes agatare,
s'ira vendicativa lassa istare
chi cun s'ira non nde faghes prou,
si ti faghet s'ofesa frade tou
comente ti tias tue cumportare.
E cando mai as su pedinu fissu
andas a vendicare contra issu.

8. Mureddu (59")

Deo cun sa vendita fatto prou
pro chi curzat su sambene a trainu,
ca sas ofesas non lasso in costou
e non nde chelzo inciamp'in su caminu,
ma si ochint a tie a fizu tou
mi naras si perdonas s'assassinu.
Ca si a cussu perdonare tese
non mi as a narrer ite babu sese.

9. Zizi (42")

De sa vendeta non nde fato impreu
perdonende già l'isco est a sufrire,
e potu su dolore cumpatire
prite a si vendicare paret feu,
ca si unu at bochidu a fizu meu
non bi ando a fizu sou a li ochire.
Ca si pensamos bene a sos congluos
tando sos assassinos semus duos.

10. Mureddu (55")

Deo in sa vendita apo oriolu
ca mi aperzo sempre sos caminos,
ca bi sunu in sa vida sos meschinos
chi causant tantu disconsolu,
Amentadilu a Tomasu Maiolu
chi at moltu chentuvinti tunisinos.
Cussa vendita che at bogadu a pizu
ca che li aiant furadu su fizu.

11. Zizi (45")

Deo a su peldonu resto amigu
cheres chi calchi iscena ti la conte,
finas sas gherras sunu unu castigu
et est giustu s'iscena chi cunfronte,
cando a gherrare ti mandana in fronte
ti narant cuddu est su tou nemigu.
E tue ses bochinde cussu die
unu babu 'e famiglia che atie.

12. Mureddu (54")

Bernardu arresonare como iseta
ca non mi as dadu bonu risultadu,
est giustu su dovere chi mi feta
cun chie un'ofesa a mie at dadu,
amenta chi sa gherra no est vendeta
ca est dovere de unu soldadu.
E nessi a lu comprendere bi resessit
ca sa vendita non b'intrat né bessit.

13. Zizi (43")

Ma Tomasu Maiolu fit gherrende
ses tue chi a prima lu as citadu,
deo finas a issu so pensende
in s'ora chi at sa terra insambenadu,
si aiat in s'ora perdonadu
calcunu ancora istadu fit vivende.
Ca dae sa vendeta ti nde amentes
tantas bortas nde bochini innotzentes.

14. Mureddu (59")

Bi ponzas a su tema contivizu
ca tenes unu tema de impoltu,
cun chie ponet unu passu a toltu
e deo sa vendita che ogo a pizu,
chentuvinti tunisinos issu at moltu
ca che li aiant furadu su fizu.
E cussu at dimustradu pensa e cre
chi est unu babu menzus de te.

15. Zizi (40")

Torrache a bier sos giustos caminos
a sa vendeta serrali sa janna,
daibi che a mie sa cundanna
e non bi agiungas àteros puntinos,
e cando mai una vendeta umana
ochire chentuvinti tunisinos.
Si a sa rejone ses devotu
cando mai culpevoles fint totu.

16. Mureddu (56")

Bellos cuncetos ses poninde in fua
e totu Narbolia si cuntentada,
amenta chi s' ofesu si lamentada
e cussa mala zenia si nde distruada
ma si intrada unu malu a domo tua
e a muzere tua violentada,
ma so cunvintu chi ti dispiaghes
ma como teves narre ite faghes.

17. Zizi (44")

Faghe comente a mie si preferis
sentza pensare in cue a faghes male,
andas a ue sos carabinieri
e ispiegas totu puntuale,
naras issos in domo su tale
est b'intradu e male at fatu deris.
Non tenzas de vendetta simpatia
chi aministret sa giustizia ebia.

18. Mureddu (52")

Tue a custas cosas ti riferis
rejone chi de me no est amissa,
ca su fatu chi est sutzessu deris
in domo tua fit cussa rissa,
ca cussu narat a sos carabinieri
a domo sua mi at giamadu issa.
E tue che maridu ses s'iscuru
e ses corrudu e afustigadu puru.

19. Zizi (38")

Ti torro sa risposta rie rie
e pensa sa risposta est importante,
naras chi muzere tua cussu die
chi agatada che l'as cun s'amante,
tue s'amante as bochidu inie
e a tie t'arrestant in s'istante.
Tue tenes destinù piùs duru
ca ses corrudu e in presone puru.

20. Mureddu (53")

Unu pagu nde tenes de rejone
in calchi cosa ti enzo in favore,
mi so difesu in cussa occasione
e non conto maridu crabetore,
però sa vida mi isforzo in presone
ma a su nessi mi salvo s'onore.
Ma tue non ti das cussas lodes
ca s'onore salvare non ti podes.

21. Zizi (38")

Però non penso de mi vendicare
s'idea nostra non paret comuna,
e né s'idea paret opportuna
deo non so decisu a isparare,
e giro in s'ora 'e la perdonare
o femina nde chilco un'àteruna.
Tento de mi nd'essire dai guai
ma sa vendeta non l'impito mai.

22. Mureddu (57")

Su bonu sensu in su palcu raduna
devimos rejonare in custa basa,
ca si de omo ja che paltis crasa
e contas de muzere a sa dijuna,
ca si ti abratzas tue un'ateruna
cheret narrer perdonada non l'asa.
Ma mantenzas de amore sa promissa
la perdonas e ti abratzas a issa,

23. Zizi (38")

A perdonare faghet piaghene
cantas copias in vida amos bidu
ant finas calchi errore comitidu
poi torrante giustu a su dovere,
sa muzere perdonat su maridu
su maridu perdonat sa muzere.
Cando perdonu mai si preparana
invece de si unire si separana.

24. Mureddu (57")

Faghemilu su santu piaghene
prite deo cumpatire non loto
sos passos de sa vida ja los noto
non che esso fora da su meu dovere,
si traighet a mie una muzere
pensa chi perdonare non la poto.
De mi nde vendicare so cuntentu
ca falsada su nostru giuramentu.

25. Zizi (42")

Cando perfeta contat s'unione
custu perdonu naschet dae sé,
pensa s'empìu de Cristos dignu re
su principe de sa nostra religione,
cando pedit perdonu su ladrone
nendeli Cristos ti amentes de me.
E Cristos li at rispostu in tantu zelu
oe cun megus benis a su chelu.

26. Mureddu (55")

A mi nde das de soddisfazione
ma sempre sa risposta est opportuna,
ca non so fizu de sa mala fortuna
ca so de sa vendita campione,
Cristos at perdonadu su ladrone
ca non li at fatu ofesa peruna.
Cun chie non mi ofendet so seguru
lu poto perdonare deo puru.

27. Zizi (44")

Naras peruna ofesa as causadu
ma pensa a Pedru apostulu devotu,
su sero in su Golgota in avolotu
a daghì a Gesù Cristos ant ligadu,
li ant si fit cun issu domandadu
at rispostu nè bidu e nè connotu.
A Cristos serradu li at sas portas
cando su puddu cantat duas bortas.

28. Mureddu (56")

A mie custa istoria mi est fadiga
ca cosa e cumentare àteru bi ada,
in su Sinedriu at sutzessu una briga
a Cristos li an dadu un'imbolada,
ma Santu Pedru aferradu s'ispada
e a Malcu nde li segat s'origa.
Si sa vendita usana sos santos
la podimos usare totu cantos.

29. Zizi (41")

Si s'iscena de Pedru as ascoltadu
si ti vendicas comitis errore,
deo ti l'apo giaru ispiegadu
Pedru in cuss'ora contat traitore,
Cristos non si est cun issu vendicadu
li at dadu su perdonu in tantu amore..
E antzi perdonende lu at decisu
de lu fagher giarie de paradisu.

30. Mureddu (54")

Amos già de custu regionadu
ca cosa de reionare meda bi ada,
ca est in su Vangelu capitadu
e già l'ischit custa zente amada,
Cristos l'at a Pedru perdonadu
Ma Pedru a Malcu perdonadu non l'ada
Amenta chi a Pedru fatu preiga
l'at cun s'ispada segadu s'origa.

31. Zizi (34")

Si aduras cun Pedru Piscadore
penso chi fetas malu risultadu,
Pedru in s'ora si mustrat difensore
ca si est comente a tie vendicadu,
ma bi est presente Cristos Redentore
e tando a Pedru lu at rimproveradu.
Nende a ti vendicare no est prou
s'orija a cuddu attaccat dae nou.

32. Mureddu (54")

Sa pius rejone mi trascuras
ca menzus proa podimos dare,
bi at cosas meda Bernardu de cricare
e brincamos in àteras cresuras,
chie ochit e violentat criaturas
comente fato a lu perdonare.
Chi mi perdonet Deus cun sos santos
lu tia fagher in piata a cantos.

33. Zizi (37")

Cando perdonu domandas a Deu
signu chi tenes fide cristiana,
mantene cussa fide sempre sana
e de issa nde fetes bonu impreu,
pensa a sos frades de Zuseppe ebreu
a daghi a issu bendidu si l'ana.
Invece de lis dare unu castigu
lis at pienu sos sacos de trigu.

34. Mureddu (58")

Penso in mundu che ndat mostros feos
cun rejone nde fato de lamenta,
ma iscultendemi est sa zente attenta
cun rejone già los ponzo in peleos,
de Hitler su tedescu ti amenta
e miliones nde at moltu de ebreos
no che ndat in sa terra omine onu
chi potzat dare aigussu su perdonu.

35. Zizi (40")

Narami si bin dat de vantagiu
a daghi como ti firmas asie,
a su perdonu ses fatende oltragiu
lassalu a Hitler riposare inie,
amenta cussu veru personagiu
lu fit vendicativu che atie.
aiat de bideas malu impreu
cherrere isterminare dogni ebreu.

36. Mureddu (58")

Cussizu chi de me no est amissu
ti torro sa risposta puntuale,
usare sa vendeta a puntu fissu
paret a mie su menzus segnale,
ca essende un'infame criminale
e cun rejone vendico de issu.
E nd' est su mundu interu soddisfatu
si enit pagadu su male chi at fatu.

37. Zizi (37")

Sa conca non che giutas in sa nue
amenta piùs in basciu deve istare,
custa idea maligna la distrue
de vendeta non sighes a trattare,
amiti chi cuss'Hitler sias tue
ti cheret ogni ebreu eliminare.
Faghimi ischire cal'est su reatu
narami cussu ebreu ite ti at fatu.

38. Mureddu (1'00")

Ma s'ebreu fit omine innotzente
no at cumissu perunu reatu,
deo vendicadore so potente
chelzo su mundu intreu sodisfatu,
e lu devet pagare su misfatu
e bi lu fato a bidere a sa zente.
Ca chi est vendicativu est sempre goi
bi la faghet pagare prima o poi.

39. Zizi (36")

Ite est peldonu imparalu o Mureddu
e de issu ti ponzas a fiancu,
de sa vendetta nde fetas a mancu
non sias furriadu de chelveddu,
si tue contas omine biancu
mai li chelzas male a su nieddu.
Ca su perdonu ti est dende cossizos
totu cantos de Deu semos fizos.

40. Mureddu (55")

Ma sa vendeta in custa occasione
tocat a mie chi ti la ispieghe,
ca de chie mi ofendet est sa neghe
e deo mi difendo sa resone,
si benit unu e mi furat s'anzone
lu perdono e mi furat s'arbeghe.
Ca sa vendeta no as in bidea
e poi mi che furat s'ama intrea.

41. Zizi (40")

E cando mai tue no as furadu
non ti giudiches santu in mesu altare,
totu semos sugetos a mancare
perfetu solu Deus est bistadu,
pensa ana nadu chi est senza pecadu
sa prima pedra proede a tirare.
E giudichende a momentu oportunu
cussa pedra tiradu no at nessuno.

42. Mureddu (56")

Pro dare a su populu recreu
mi tzitas su perdonu in paragone,
eo rispetto sa santa religione
proite su rispetu mi est recreu,
ma mi rispondas tue poite Deu
non lu at perdonadu a faraone.
Antzis at mandadu in cussu situ
E sas sette piagas a s'Egitu.

43. Zizi (37")

Su chi mi naras como est pantumina
non torres a cumitere cussu errore,
Deus at diferente raighina
issu no est umanu peccadore,
e non li nelzas chi est vendicadore
ca Deus est Giustitzia Divina.
Si ti vendicas tenes coro duru
chilcas cudda giustizia tue puru.

44. Mureddu (52")

De ogos ti nde ogo cussu velu
pro presentare un'opera discreta,
e cal'est sa rejone como atzeta
zaghì tenes a Deu fide e zelu,
e narami proite de su chelu
s'anzelu imbiat de sa vendeta.
Usat de sa vendeta sos manizos
e moltos già li sunt sos primos fizos.

45. Zizi (40")

A Deus non lu ponzas in iscena
narrer vendicativu paret feu,
faghe comente a Cristos fizu 'e Deu
cando et de fronte a issu Madalena,
in domo de Simone fariseu
pianghinde in cuss'ora in tanta pena.
E tando Cristos isclamadu ada
bae ses Madalena perdonada.

46. Mureddu (54")

Cando in sa terra ana cumissu male
e chi fint gai andende a s'anda e torra,
e at detzisu su Deu imortale
ja che cheret bogada sa zavorra,
e mandat su diluviu universale
at distrutu a Sodoma e Gomorra.
A tie non ti andat pro disvagu
ma su perdonu si asimizat pagu.

47. Zizi (39")

Mi pares tue su Deus Divinu
ma no podes che issu cumandare,
chi ses omine amentadi continu
e chi sa legge debes osservare,
ca si faghes in vida s'assassinu
tzertu Deus no ti at a perdonare.
As comissu terribile reatu
as a pagare su dannu chi as fatu.

48. Mureddu (52")

Tando che ses bessinde 'e su pelevu
e bene resonende ses in cue,
ma sa vendeta usala in totue
e non mi nerzas chi est fatu feu,
ca no est sempre chi perdonat Deu
non podes perdonare mancu tue.
E non nde fetas de parte contraria
poite est sa vendeta netzessaria.

49. Zizi (40")

Cando as un'isbagliu comitidu
tando ses giudicadu in tantos grados,
in su presente che in tempos passados
tzertu chi chie mancat est punidu,
bides in pula in posta sunt bintrados
in cussa posta ite at sutzedidu.
Bi est sa giustitzia pro los giudicare
ma cussu non si tratta vendicare.

50. Mureddu (54")

Un'ateruna istrada como aberis
e mi ses dende menzus resultados,
e custu fatu est sutzessu deris
chi a sa posta ja intrans armados,
nara poite sos carabinieri
no arribana ainie disarmados.
Si bistat su perdonu in cussu situ
no aiant fatu a fogu su conflictu.

51. Zizi (39")

Ma cussu non si trattat vendicare
cussu est a fagher s'issoro dovere,
e Tzelestinu a tie fago creere
cando enit s'ora de los cundennare
cando de libertade no ant podere
in sas presones tevene restare.
Daghì arrivana a tempus futuru
finas in cue bi at perdonu puru.

52. Mureddu (55")

Ma tenzas sa logica vicina
ca deo so presente in dogni iscena,
e si riflettere bi teves apena
ca bi est de sa vendita sa faina
ca esistit sa giustitzia terrena,
esistit sa giustitzia divina.
E si bene rifletes como in cue
ja bisto piùs deo chi non tue.

53. Zizi (48")

Tue non bi intras mai in cuss'iscena
a tie non ti dana sos permissos,
cuddos possedin sos codices fissos
tue nd'as unu malu a malapena,
e tando in cussa istoria terrena
lassa chi giudicare devant issos.
Ognunu impreat sa giustitzia sua
non ti fetas giustitzia a manu tua.

54. Mureddu (55")

Semos o Bernardu a primu atonzu
e nde sutzedid de donzi manera,
ca de si vendicare est su bisonzu
sa zente de custu andat fiera,
e si bi at unu falzu testimonzu
chi innotzente ti che etat in galera.
Si che omine giustu l'arresonas
a mi lu naras si cussu perdonas.

55. Zizi (38")

A tie ti at a parrer meraviglia
pro tzertos chi che a mie ant perdonadu
ca si ponimos fatu a sas puntiglias
in sa Sardigna meda est capitadu,
cando si est dognunu vendicadu
isterminadu ant tantas famiglias.
Ca sa vendeta ti at famadu gai
una cadena chi non segat mai.

56. Mureddu (59")

Matteu Tolu fit omine intreu
proghè sa sorte l'at postu in guai,
ma sos amigos at postu in peleu
prite tando sas regulas fint gai,
a sas ofesas no at nadu mai
su chi azis fatu bo lu paghet Deu.
E ne àteros santos si est promissu
ca pagadu sind'est sempre isu.

57. Zizi (40")

Si de su fizu prodigu asa intesu
cando si est de su babu alluntanadu,
innanti sa richesa li at pretesu
e at finas su babu maltratadu,
ma cando sa richesa si at ispesu
tanto de nou a su babu est torradu.
E invece de li segare sa testa
su babu cussu die at fatu festa

58. Mureddu (59")

Però de Tolu che restas distante
ca si aberit de galera sos cancellos,
amenta chi at domadu sos ribellos
issu 'intu lu at dogni isfidante,
e l'ana fatu essende latitante
a capitano de sos barracellos.
E a sos ladros at dadu una surra
e finidos sos furtos in sa Nurra.

59. Zizi (40")

Non ti cumportes de cussa manera
impara a biver comente unu santu,
e usa su perdonu a fama e bantu
est fea sa vendetta cussidera,
as bidu finamentas in sa galera
chi lis dana s'indultu dogni tantu.
E s'argumentu piùs bellu e seguru
cando perdonat sa giustitzia puru.

60. Mureddu (56")

In s'argumentu ti scherzo sighire
però ca bi at errore cussidera,
de indultu e condonu est sa manera
non lu cheren su malu pessighire,
lu perdonas e ch'essit dae galera
e torrat a furare e a bochire.
Rendedi contu fina a sos conclusos
sunu isbagliados sos perdonos tuos.

61. Zizi (40")

Ses tue chi non teves isbagliare
ses tue chi comitis su peccadu,
ca si furende ti apo arrestadu
e su condonu chelfidu apo dare,
a daghi in libertade ses torradu
proite est chi prosighis a furare.
Bides inue sempre intro de gue
e sa culpa la tenes sempre tue.

62. Mureddu (54")

Pone a rejonare cabu e bundu
ca semos cantende in Narbolia,
e cumprendent sa vera poesia
analizant su tema bene a fundu,
si che sunu sos malos in su mundu
caru Bernardu no est neghe mia.
Deo de custa parte mi agato
si mi ofendent pagare los fato.

63. Zizi (36")

Sa lotta nostra faghimos finida
e non penso chi bi epat malumore,
deo prego a mannos e minores
tenzant su perdonu pro guida,
tantu pensende in sa terrena vida
lu semos totu cantos pecadores.
Si cherent sa vendeta posta in motu
sentza sa conca fimis istados totu.

64. Mureddu (57")

Isco chi est su perdonu una bellesa
e faghes bene a mi lu ispiegare,
ca chie una ofesa ti at a dare
lu trates cun piùs tzentilesa,
e s'omine chi est bonu dogni ofesa
E prus che zustu a la perdonare.
Ca abratzare e perdonare totu cantos
che sa regula fissa de sos santos.

2° tema, "sa paura" Zizi – "su coraggiu" Mureddu

1. Zizi (*tempo esecuzione 53"*)

Su primu tema est postu in abandonu
però tevimos sighire a cantare,
innanti fit difficile arrejonu
e difficile a l'ispiegare,
deo non mi cheria vendicare
proite ai 'e difender su perdonu.
Como puru s'impresa paret dura
ca mi ant dadu a cantare sa paura.

2. Mureddu (*1'01"*)

Torramos a bi ponner cabu e bundu
a custa gara nostra 'e poesia,
e si podia cun cuntzetu profundu
olende in altu cun sa fantasia,
ma como intantu su tema segundu
bos naro chi lu tenzo in manu mia.
E sa sorte mi at fatu un omagiu
ca a mie mi est tocadu su coraggiu.

3. Zizi (*40"*)

Como ses Tzelestinu coragiosu
e teves dare sa proa sigura,
partinde cun cust'àtera avventura
dimustrat chi ses sempre valorosu,
deo so diventandu paurosu
daghì mi at fatu gai sa natura.
Ma unu ditziu sardu in giaru esprime
narat si salvat sempre chie timet.

4. Mureddu (58")

A mie su coragiu faghet corte
e istanote già lu ponzo in fua,
non mi apo a presentare a s'acua
daghì de issu apo tentu sa sorte,
deo non timo nemancu sa morte
e tue times finas s'umbra tua.
De su tzentile populu a presentzia
dimustramos sa nostra diferentzia.

5. Zizi (38")

Deo ca timo chilco su riparu
mai coragiu nde apo dimustradu,
ca dae Gesù Cristu apo imparadu
a Pregadu su sou babu caru,
timinde prima 'e l'aere incravadu
nende a li frangher su calighe amaru.
Signu chi prima 'e laere crocifissu
sa morte l'at timida finas issu.

6. Mureddu (1'02")

Su fizu de Zusepe e de Maria
ca fit coraggiosu est riconnotu,,
amenta su ladrone disconnotu
ite li aiat nadu in s'ora 'e s'agonia
Si est beru chi ses tue su Messiaa
tenta de salvare a tie etotu.
Ma salvadu non si est su fizu 'e Deu
salvat morinde custu mundu intreu.

7. Zizi (39")

Ma cando Gesù Cristu fit naschidu
su tema meu nos faghet ischire,
Erode at minetadu de lu ochire
e Zusepe e Maria ana timidu,
ana ispettadu su notte a arrivire
e cun cussu burricu ana fuiddu
Ca pro salvare Cristos Beneditu
Timende a note fuini in Egitu.

8. Mureddu (59")

Ite contat sa tua pauria
non mi ponet pelea e nen matana,
antzis mi paret una cosa vana
e totu ispiegare ti che ria,
e narami proite su Messia
s'eroe 'e sa religione cristiana,
e lu giamant eroe 'e su calvariu
s'offerit a sa morte voluntariu.

9. Zizi (45")

Bi at sempre paura in sos umanos
ma tue non lu cheres amitire,
sos fatos coragiosos sunt metzanos
non sempre in bene benini a finire,
si ti amentas sos primos cristianos
sempre timende a los persighire,
ca sos persecutores los timiana
intro sas catacumbas pregaiana.

10. Mureddu (58")

Che fint cuados in su magasinu
faghiant a s'accua preghiera,
ma su coragiu meu cussidera
aberit de libertade su caminu,
Ti debes amentare Costantinu
in hoc signo vinces in s'aera.
Imponet cun coragiu su silentziu
a sas barbaras ordas de Massentziu.

11. Zizi (41")

Ma deo timorosu so totue
e sas gherras mi faghene ispaventu,
tzertu gherrende chi non morzo in cue
ca sa paura mi dat piùs sustentu,
cando iscadenant su cumbattimentu
in prima linea bi as andare tue.
Eo cando su cannone intrat in lite
grido continu armiamoci e partite..

12. Mureddu (55")

Ca sese paurosu lu comprendo
non bi at bizonzu chi bo lu raconte,
ma deo de coragiu mi nde intendo
et est zustu sas armas chi m'apronte,
e fieru e ardidu in su fronte
sa cara patria mia la difendo.
Ma tue a gherrare non bi andas
ca si nono t'imbrutas sas mudandas

13. Zizi (35")

Deo sa mudanda apo segura
pro chi non molza in su cumbatimentu,
tue invece non tenes paura
e coragiosu anda a cussu intentu,
ti ana a faghene unu monumentu
mortu ti ana a tzitare in s'iscritura.
Ma chi la lezas tue non bi creò
cussa iscritura l'apo a lezer deo.

14. Mureddu (1'00")

Però deo canto fieru e coragiosu
e bi devo andare prontu a gherrare,
Ma Nino Bixio ti chelzo amentare
fit unu che atie paurosu,
cando idet su nemigu numerosu
in desegus cheriat furriare.
Però Garibaldi gridat forte
o si faghet s'Italia o est sa morte.

15. Zizi (41")

Si amentas in tempos non lontanos
la fini cussa guerra preparende,
fini già totu prontos sos pianos
però su tema meu fit bintrende,
s'America sos russos fi timende
e sos russos sos americanos.
Pro cantu sos istados timent gai
semos seguros non gherranat mai.

16. Mureddu (56")

Ma deo su coragiu juto a pala
e apretzant sa bella opera mia,
de Garibaldi dogni valentia
che coragiosu distintu a donzi ala,
amenta de s'isbarcu de Marsala
e finas a sa breccia 'e Porta Pia.
Ca cussos coragiosos fatu ana
sa nostra nazione italiana.

17. Zizi (38")

Cun su coragiu faghes mala iscola
non semper tes Tzeleste trionfare,
a mie bastat una mossa sola
pro paura mi poto ribellare,
fingi semos armados de pistola
total duos b'intramos a brigare.
Deo de mi salvare tenzo istima
daghi so paurosu isparo prima.

18. Mureddu (55")

Tue rajonas in dd'unu modu istranu
o giughes sos chelveddos bola, ola,
ca si as de paura cussa iscola
si ses de fronte a mie bi at arcanu,
leat su paurosu sa pistola
e treme, treme la giughet sa manu.
Ca sa paura tua idende sese
so cunvintu ti isparas sos pese.

19. Zizi (36")

Non nd'apo a fagher de bruta figura
non mi decretes gai sa sentenza,
cando so guidende una vetura
sa paura mi imponet sa prudentzia,
invece tue non tenes paura
acellerende ses a prepotenzia.
E cando su volante non controllas
cun su coragiu cures e t'iscollas.

20. Mureddu (56")

Ma bi debes riflettere dogni istante
ca non nde tenes de parte segura,
si ses guidende sa vetura
penso su coragiu est importante,
si guidende jà tenes paura
za jughes treme, treme su volante.
In sa guida ses pagu seguru
bochis a tie e àtere puru.

21. Zizi (35")

Cun su coragiu tenes sa cundanna
ti l'ispiego deo sa rejone,
fingi chi in domo una fiamma manna
chi est brusende s'abitazione,
tando non podes bessire in sa gianna
tando ti nd'etas dae su balcone.
Incue bi tenzo deo su vantagiu
da sa paura naschet su coragiu.

22. Mureddu (54")

Cun sa paura tua in custu logu
non bi podes andare tropu atesu,
poite su coragiu si as cumpresu
e de veru eroismu dada isfogu,
a daghi bi at unu fogu atzesu
si che etat una mama a cussu fogu.
Cun su coragiu chi at bogadu a pizu
si morit issa ma salvat su fizu.

23. Zizi (39")

In cue arejonamos una iscuta
a su coragiu tepes ponner frenu,
no est parte 'e coragiu assoluta
in cue bi intras in su campu anzenu,
una mama s'ìmbolat a su trenu
si idet chi su fizu andende est suta.
No est coragiu chi ogada a pizu
est sa paura de perder su fizu.

24. Mureddu (51")

Mi ses nende Bernardu pagu cosa
ponebi a rejarare contivizu,
ca est una mama coraggiosa
chi de su trenu si salvat su fizu,
ma narami una mama paurosa
ite coragiu ti ogat a pizu.
Antzis su fizu li ruet de pala
e si che girat issa a s'àtera ala.

25. Zizi (38")

Non nelzas coragiosa a sa femina
issa su tema meu est presentende,
osserva fina cando est tribagliende
in sos contos chi tenet in coghina,
cun dd'un'uju est atenta a sa faina
cun s'àteru su fizu est controllende.
L'osservat dogni istante premurosa
timende a li sutzedere calchi cosa.

26. Mureddu (51")

De ti risponder non mi potzo astennere
ma est su meu su meritu mannu,
si in su rejonu bi cheres trattenere
ti lu naro sintzeru senza ingannu,
sa mama est pronta a intervenere
ca su fizu non poder tenner dannu.
E l'es semper mirende a oju fissu
de salvare sa vida li at promissu.

27. Zizi (35")

Canta cosa si podet imparare
it'est paura benit a l'ischire,
e cantu est bella debes amitire
sa paura ti faghet onorare,
chie timet non bi andat a bochire
chie timet non bi andat a furare.
Unu chi timet vivende serenu
amat su sou e respetat s'anzenu.

28. Mureddu (55")

Tue ti cheres ponner in risaltu
ma adenanti non pones unu passu,
ti l'ispiego deo in custu zassu
ca sa paura est cosa de iscaltu,
su paurosu non falat a bassu
su paurosu non pigat in altu.
Ca faghet sa paura malu efetu
in sa vida non faghes unu tretu.

29. Zizi (33")

Su paurosu tenet menzus sorte
e da su coragiosu diferente,
mancari non si mustret tantu forte
sa paura continu l'at presente,
issu non tocat filis de currente
ue ana iscrittu perigulu 'e morte.
Invece tue faghes s'azardadu
tocas su filu e restas fulminadu.

30. Mureddu (51")

Ite cheres Bernardu ispiegare
ca non faghes cun megus concuista,
sa paura est una cosa trista
e bonu prou non nde podes dare
ma si so deo un'electricista
isco sos filis comente toccare.
Chi bi intrat su coragiu isco e creo
comente 'e los toccare l'isco deo.

31. Zizi (36")

Tue ischis inue ses tohende
ca de coragiu tenes parte tanta,
ma cun cussu coragiu piùs agguanta
ue sa morte ti ses procurande,
eo s'aera si la ido lampende
non bi ando mai suta sa pianta.
Invece tue che aduras inie
e i su lampu benit sempre a tie.

32. Mureddu (52")

Bi est sempre sa bella opera mia
fini in su lampu chi enit dae s'aera,
prite su coraggiosu cussidera
chi faghet sempre una valentia,
su coraggiosu est in sa miniera,
su coraggiosu est in sa funderia.
De su coraggu est sa nobile impresa
a nde ogare a foras sa richesa.

33. Zizi (36")

Deves timire nessi calchi iscuta
e non tenzas coraggu solamente,
ca podet capitare s'ora bruta
ue su tema tou est sempre assente,
su marineri at unu salvagente,
e su pilota su paracaduta.
Signu chi in aria o unda tempestosa
timet a bi sutzedet calchi cosa.

34. Mureddu (56")

Ma sa paura est una cosa grave
non faghet rejonare a sinnu sanu,
tue cun issa già bistas suave
e arrivare non podes lontanu,
tue as paura de setzere in nave
e as paura de s'areoplanu.
E cando ides un'aeropoltu
ses zai de paura mesu moltu.

35. Zizi (36")

Su chi mi naras non totu l'atzeto
deo la penso de àtera manera,
tue chi as de coragiu su brevetto
lu miscias cun paura cussidera,
cando falas in fundu in miniera
a bite in conca ti pones s'elmeto.
Ca times calchi cosa 'e bi falare
chi sa conca ti podet ischitzare.

36. Mureddu (1'04")

Faghet de mi cumprender sa rejone
non bi ruas Bernardu in cuss'isbagliu,
ca non pones sa vida a repentagliu
ca non bi peco de presuntzione,
ca teves rispettare ogni pessone
sa regula fissa 'e su tribagliu.
Deo cun su coragiu mi dileto
ma su tribagliu gai lu rispeto.

37. Zizi (37")

Si teves dogni cosa rispettare
deo so s'argumentu rispettende,
in sos esempios chi ti so tzitende
mai paura bi tevet mancare,
si unu in mesu mare est annehende
tzertu non bi intro deo a lu salvare.
A lu salvare pagu mi interessada
comente nde bintradu chi s'indessada.

38. Mureddu (54")

Tue si rues in crisis nieddas
S'opera 'e su coraggiu no as cumpresu,
ca solu de paura mi faeddas
e no intendes sas boghes dae tesu
su coraggiosu si ch'intrat in mesu
e salvadu ti at tres piseddas.
A sas undas at fattu s'isfida
a totas tres lis salvat sa vida.

39. Zizi (40")

Si naras totas tres los at salvadas
e cherent dare su meritu a tie,
deo no aia fatu de asie
già las aia in mare lassadas,
si l'aian timidu che a mie
cussas in mare non bi fint intradas.
E senza dare de coraggiu isfida
aian totas tres salva sa vida.

40. Mureddu (56")

Cun sa paura non nde das de prou
e non ti podes ponner de azardu,
ma si rifletis dae chitzo a tardu
e lassare la teves in costou,
e s'ides anneghende a fizu tou
comente ti cumportas o Bernardu.
Si lu sighis cun megus s'arrejonu
già teves esser unu babu onu.

41. Zizi (35")

S'idea de su fizu fit tzitada
e non la cherzo 'e nou ripetire,
però a fizu meu fato ischire
non b'intres mai in s'unda avolotada,
ca tzertu deo non bi apo acudire
si in cuss'ora bisonzu aberu bi ada.
Ca si bintrera deo a sos conclusos
in su mare sos mortos semus duos.

42. Mureddu (53")

Non mi che allontanano de su mare
ca tento 'e lu salvare su peleu,
ca cussu mi dat gioia cun recreu
e su coragiu lu devo mustrare,
ca s'ido anneghende a fizu meu
deo ainie già bi tevo intrare.
Ca non lu lasso morrer in s'abissu
ca do sa vida pro salvare a issu.

43. Zizi (40")

A bite su timore dende ispantu
a bite a issu non ti des unire
si as paura tenes fama e bantu
cun sa paura podes avertire,
narrer a fizu tou dogni tantu
fizu meu sa droga est de timire.
Cantos giovanos ponet in disagiu
cussos chi a la leare non an su coragiu.

44. Mureddu (55")

Ma deo in cussas cosas mancu bisto
no est a nde tzitare necessariu,
ca a totu sos atacos bi resisto
fato de sa paura su contrariu,
amentadi a Salvo d'Acuisto
si oferit a sa morte voluntariu.
E contat coraggiosu veramente
ca morit pro salvare àtera zente.

45. Zizi (35")

No est beru chi contas coraggiosu
ca non semper das proa de valore,
si in sa carena bi intendes dolore
diventas in cuss'ora paurosu,
tando ses che a mie coraggiosu
e andas lestramente a su dottore.
Sa paura bi naschet puntuale
timinde no avantzet cussu male.

46. Mureddu (53")

Amustralu Bernardu su talentu
ca rejonende goi ses decaidu,
ca su coraggiu in dogni momentu
de sa vida già ti aberit s'aidu,
ma si tenet paura su malaidu
paura at su dottore in s'interventu.
Sa paura ti causat disterros
e cussu morit in suta ' sos ferros.

47. Zizi (39")

Ti lu ripito torra in sardu cantu
ti lu aia tzitadu a prima sera,
sos coraggiosos de cussa manera
in Pula no ana fatu tantu incantu,
unu riposu at in campusantu
e sos àteros tres in sa galera.
Sos chi ant coraggiu gai sunt suggetos
fina a bider su sole a quadretos.

48. Mureddu (53")

Su coraggiosu est che su leone
e lu difendet su sou vessillu,
lu presentat in dogni occasione
in sa vida est serenu e tranquillu,
a sos tempos de Piras e Tucone
fist in mesu issoro unu cunillu.
Non ti ses mezoradu in su futuru
ca sese unu cunillu como puru.

49. Zizi (39")

Ma fingi chi cunillu como sia
chi poto morrer dae s'ispaventu,
no est coraggiu mai nd'apo tentu
non fato brincos cun sa fantasia,
ma deo tzito a tie in su momentu
pares chi tenzas tanta pauria.
E timende a ti dare calchi atacu
zughes su coro che polcheddu in saccu.

50. Mureddu (54")

Ma sa natura mi at fatu omaggiu
pro chi tenza rispettu e riguardu,
e deo già mi ponzo de azardu
afrontende 'e sa gara su viaggiu,
non ses bidinde cun veru coraggiu
so afrontende a Zizi Bernardu.
In Narbolia e in aterue
ca su chi ses timinde già ses tue.

51. Zizi (39")

Deo a su tema tenzo simpatia
cun custos paragones curiosos,
pro sos poetas chi tzitas famosos
deo lis sapo fatu cumpagnia,
issos fini sos duos coraggiosos
e deo su cunigliu tando fia.
Pro esser coraggiosu 'e campu fora
et des menzus conigliu e biu ancora.

52. Mureddu (55")

Isfrutala Bernardu sa virtude
ca faghes custa gara una bellesa,
ca in su cantu non bind'at ofesa
e non contas poeta lanzu e rude,
ma tue as timidu in gioventude
e como ses timinde a sa etzesa.
Cheret narrer su poeta de Onifai
chi sa paura non li mancat mat.

53. Zizi (40")

Cando mai non dasa attenzione
finas in sos momentos piùs galanos,
e finamenta in s'improvvisatzione
cussos poetas mi amento antzianos
apo lotadu a Piras e Tucone
essend' in palcu tremidu ant sas manos.
Ca sa paura naschet frecuente
finas de fronte cando bi est sa zente.

54. Mureddu (56")

Deo mind'esso de cussa piega
mi presento cun impetu potente,
tue comente podes ti ispiega
oghende sa virtude de sa mente,
deo no apo paura 'e su collega
e deo no apo paura de sa zente.
Abile e coraggiosu ja mi conto
e totucantas sas cosas afronto.

55. Zizi (40")

Cun sa paura unu apena arreiona
non che gires sa facia a s'atera ala,
unu pagu 'e paura mi signala
si aberu contas fizu 'e s'elicono,
no ischis si sa gara bessit bona
no ischis si sa gara bessit mala.
Si non bi at de paura unu momentu
contas poeta senza sentimentu.

56. Mureddu (52")

Deo ponzo a cantare aficu e cura
e mi presento de fronte a sa zente,
e non de potu tenner de paura
si conto deo eroe potente
e nde ogo custu donu 'e sa natura
e totu sa virtude chi apo in mente.
Poi sos chi iscurtande innoghe arreana
comente bessit sa gara si la leana.

57. Zizi (45")

Chie tene paura sempre imita
e tenzas che a mie impressione,
aferra 'e sa paura su timone
e cun issa in sos parcos faghet gita
temias sa paura 'e notte frita
ti as postu custu sero su maglione.
E ca nemancu 'e issu fis seguru
ti ndas battidu su capoto puru.

58. Mureddu (57")

Za ti cumprendo in cussu faeddu
chi no ses aturdidu e ne confusu
ma nois de cantare amos usu
ca amos una virtude in su cherveddu
deo aia paura de piseddu
de bi pigare a sos palcos susu.
Oe cussa paura ja apo intu
in calchi gara ja mi so distintu.

59. Zizi (37")

In dogni cosa bi amos de timire
e si fata pro natura ogni pessone,
non pote corazosu presumire
senza bi aere de paura portzione
tue su note andas a dormire
tancas sa janna e tancas su balcone.
Deo ca sa paura la rispetto
ponzo a sa janna dopiu lucheto.

60. Mureddu (56")

Deo ja non de tenzo de paura
custa Bernardu est cosa tzerta,
e no at a essere nemancu un'iscoberta
s'opera mia ja est pius segura
e deo ca non timo pro sa fura
ja corco donzi note a janna aberta.
E penso chi su ladru notte e die
at paura de intrare a inie.

61. Zizi (36")

Como su tema ponimos a riposu
duradu es fintzas tropu s'argumentu
e l'amos fatu fintzas curiosu
cun s'intentu 'e lis dare su cuntentu
unu momentu unu es paurosu
est coragiosu in s'ateru momentu.
Tenimos totu pro legge de natura
una dose de coragiu e de paura.

62. Mureddu (56")

De serrare su tema est doverosu
ca est ora 'e la fagher finida,
unu populu goi generosu
at premiadu custa nostra isfida,
ma ischimos chi est su coragiosu
chi podet mezorare in custa vida.
De andare a denanti at interessu
e s'aberit sa via 'e su progressu.

DUINAS

Zizi (13")

In modu su programma 'e cumpletare
ponimos como in mesu sa duina.

Mureddu (9")

S'intendet de su fritu sa muina
devimos custa gara terminare.

Zizi (7")

Però nos tocat de ringratziare
si ancora sa zente amos vicina.

Mureddu (7")

E deo la ringratzio'e veru coro
custa bella attenzione issoro.

Zizi (10")

Piùs a prestu mancat sa lughura
non la podimos bider tota canta.

Mureddu (11")

Ca s'opera issoro bella e santa
iscultende su donu 'e sa natura.

Zizi (8")

Issos ident a nois canta canta
però sunt postos in sa zona oscura.

Mureddu (7")

Ma narant sos verso cumprendimos
però nois a issos non bidimos.

Zizi (10")

S'interessante est chi epant iscultadu
as intesu chi ant puru aplaudidu.

Mureddu (8")

Canta fama e lode ti ana dadu
tue ses su poeta preferidu,

Zizi (6")

A tie prima non ti ana iscultadu
como ti ana a narrer bene enidu

Mureddu (9")

Cando sas cosas risultana goi
ant intendere a mie 'e como in poi.

Mureddu (10")

Nos iscultana ancora totas duos
ca foltzis lis faghimos piaghene.

Zizi (8")

In su tempus chi enit est de creere
cussos diventant sos tifosos tuos.

Mureddu (8")

Non ses de sa vida a sos conclusos
lu faghes ancora su dovere.

Zizi (7")

Como iscultende a tie si disvagana
però pro custa olta non ti pagana.

Mureddu (8")

A mie pagat sa provincia mia
e sa paga già mi dat etotu.

Zizi (9")

A tie pro chi enzas riconnotu
lassa chi gratis los cantes ebbia.

Mureddu (7")

E pensa de cantare in poesia
e lassa de sas pagas s'abolotu.

Zizi (5")

Naralis pro sa prima preferentzia
chi est una gara pro beneficentzia.

Mureddu (8")

Ma deo gai non lu poto narrere
proite sa paga mi la dana crasa.

Zizi (3")

A tie totu gai ti at a parrere
no ischis ricumpensa si bind'asa

Mureddu (9")

Ma tue in su palcu como pasa
Proite cosa ja bind'at de

Zizi (7")

narat su cossizu provinciale
nachi ti firmana una cambiale

Mureddu (12")

Ma deo cambiale non nde chelzo
proite est su inari chi prefelzo.

BATTORINAS

Zizi (22")

Como cantamos una battorina,
su inari chi siat bonu proe
e i sa santa chi cantamos oe
a custa zente sempre istet vicina,
a la cantamos una battorina.

Mureddu (25")

A la cantamos uma battorina,
sunt de sa vida sos momentos raros
narrant chi sos poetas sunu caros
invece sa chi est cara est sa benzina,
a la cantamos una battorina.

Zizi (26")

A la cantamos una battoreta,
m'invoco a custa santa novamente
diat benedizione a custa zente,
beneigat puru su poeta,
a la cantamos una battoreta.

Mureddu (31")

A la cantamos una battoreta,
imbiet paghe e gosu cun recreu
e chi finat in custu mundu intreu
s'odiu, sa puntiglia e sa vendeta,
a la cantamos una battoreta.

Zizi (23")

A la cantamos una noitola,
Faghelis Reparada cumpagnia
sos chi ti faghent festa in Narbolia
guida, agiua illumina e consola,
a la cantamos una noitola.

Mureddu (33")

A la cantamos una noitola,
a dognunu in sa vida acumpagna
e dogni annada ona a sa campagna
e s'istudente rendat in iscola,
a la cantamos una noitola.

Zizi (24")

A la cantamos una paesana,
alluntana perigulos e dannos
faghe da oe finas a chent'annos
non sonet più a mortu sa campana,
a la cantamos una paesana.

Mureddu (23")

a la cantamos una paesana,
pensabi tue e sa sede divina
a su pretziu chi est oe sa benzina
chi che pighet su latte cun sa lana,
a la cantamos una paesana.

Zizi (22")

A la cantamos una furistera,
tue chi amore tenias profundu
faghe in dogni contrada de su mundu
s'amore regnet cun sa paghe vera,
a la cantamos una furistera.

Mureddu (30")

A la cantamos una furistera
a sos devotos chi sunu in presentzia
li dias in sa vida ogni assistentzia
e iscultes ds'issorto preghiera,
a la can tamos una furistera.

Zizi (29")

A la cantamos una bruschistriglia
totu sas grazias tuas lis dispone,
e i sa tua benedizione
da oe tenzant in dogni famiglia,
a la cantamos una bruschistriglia.

Mureddu (26")

A la cantamos una buchistriglia
lis dias s'azudu in dogni impresa
e pone in dogni domo sa richesa
e tenzant sa salute a meraviglia,
a la cantamos una buchistriglia.

Zizi (28")

Finimula cun dd'una tarantella,
mai connoscant trista ora peruna
a totu dias sa bona fortuna
distinta immortale verginella,
e la finimus cun sa tarantella.

Mureddu (30")

Como finimos cun sa tarantella,
a donzunu illumina e guida
lis dias donzi bene in custa vida
los beneigas dae sa capella,
e si finit cun custa tarantella.

SONETTOS

Zizi (2'53")

Cando Deciu romanu imperadore
contra a sos cristianos airadu,
sa persecuzione at ordinadu
cun sas penas de morte e cun terrore.

In su seculu terzu 'e su Signore
Reparada ti aiant arrestadu
coraggiosa pro aere affirmadu
chi creias in Cristos Redentore.

Doighi annos aias solamente
cando in sa Cesarea 'e Palestina
as versadu su sambene innotzente.

Onorende de Cristos sa dotrina,
s'anima tua che astru lughente
bolada est santa a sa sede divina.

Como chi ses inie verginella
a Narbolia chi ti est onorende
ogni male, ogni pena li cancella.
Bintres in dogni domo beneighende
e comente fidele sentinella
continu los proteggi e los difende.
Annadas bonas mandes in favore
a chie onestamente est tribagliende
li ricumpenses totu su suore.
Comente ti est preghende dogni mama
pro dogni fizu chi at allevadu
apaghes dogni ispera e dogni brama.

A presidente e a su comitadu
chi ti faghent sa festa dignamente
prepara unu avvenire fortunadu.
Ringraziende a tie amiga zente
pro mi aer dadu ancora preferenzia
ti lasso in festa e bona permanentzia.

Mureddu (3'31")

Reparada s'umile esistentzia
a Cristos Redentore l'at donada,
in coro sou logu non bind'ada
pro fagher cun paganos connoschentzia.

Non s'est de front' a Decio imbenujada
non li at fatu peruna riverentzia,
indispetidu l'at martirizada
pronunziat de morte sa sentenzia.

S'atzota su martiriu cun sa pena
as afrontadu in sa funesta die
retzis sa morte cun dd'unu sorrisu.


E si est formada in sa pista carena
una columba bianca che su nie
e ch'est bolada ereta a paradisu.

Ma como de inie epas detzisu
de la ghiare tota custa zente,
benes immensos e males niente.
Si godana in sa longa vida issoro
cun s'amore e sa paghe intro su coro

cun dogni àteru bene in possidentzia.
Aumentes de totu sa virtude
su bene pretziosu 'e sa salute
tenzat donzunu unu seculu intreu.
Felicidade, gioia cun recreu,
sena connoscher né males, né dannos
sos benes e azudos piùs mannos
los dias a s'illustre comitadu
Cun totu sos chi sunu a sa presentzia.
deo sia 'e sos errores perdonadu
ca mai tropu est s'isperientzia.
E bos ringratzio 'e sa bella acoglientzia
chi m'azis fatu in sa ostra dimora,
cun s'isperantzia 'e che cantare ancora
adiosu e bona permanentzia.

Associazione Culturale Poetas Improvvisadores

Stampa a cura dell'Associazione Culturale Poetas Improvvisadores
Finito di stampare NOVEMBRE 2008



Trascrizione e correzione curata dai
soci dell'Associazione con la
supervisione di
Mura Giovanni Antioco